


春秋後傳

五之八

漢書門			
類	號	函	架
三	六	一	五
三	九	一	八
三	九	一	五

內閣文庫			
類	號	冊	函
三	六	一	五
三	九	一	八
三	九	一	五

內閣文庫	
番號	漢 2063
冊數	395 (310)
函號	369 108



止齋先生春秋後傳卷第五

淺草文庫

僖公

元年春王正月齊師宋師曹師次于聶北救邢有公羊傳

救不言次言次無志於救也狄伐邢於是三歲矣

桓公足以攘狄而宿師於聶北玩寇以待其弊邢

潰奔師而後遷之是故凡救譏也言次甚譏之也

夏六月邢遷于夷儀



自遷不書據文十三年邾遷于繹成六年晉遷于新田之類有遷之者而後書由

莊公而下以中國遷中國書曰某人遷某罪遷之

者也由僖公而下以夷狄遷中國書曰某遷于某

罪遷者也以齊晉之伯也而狄伐邢邢遷于夷儀

通志堂



狄圍衛衛遷於帝丘雖夷狄之暴橫而桓文亦受其咎矣

齊師宋師曹師城邢有公羊傳

此救邢之師也使之若再有事然志桓慢世狄伐邢於是三歲桓公足以攘狄而宿師於碯北玩寇以待其弊邢潰而後遷之桓公見義不勇矣

秋七月戊辰夫人姜氏薨于夷齊人以歸有傳楚人伐

鄭

荆始書楚自是楚有事於諸侯皆稱人

八月公會齊侯宋公鄭伯曹伯邾人于櫟九月公敗邾師于偃冬十月壬午公子友帥師敗師莒于鄆獲莒

拏有公羊傳

獲非卿帥不書據囚宋華元獲樂呂但書華元獲齊國書公孫夏但書國書之類莒拏非卿

也則何以書嘉季子也慶父弒君之賊也莒人納焉賂而後歸之魯於是敗其師獲拏而魯之內難始定

十有二月丁巳夫人氏之喪至自齊有公羊傳

二年春王正月城楚丘有公羊穀梁傳

於是諸侯城楚丘而封衛則其以魯辭書之但曰城楚丘何不以累桓公也諸侯之義不得專封不以專封衛累桓公也以魯辭書之使之若諸侯同欲然上無明天子下無方伯諸侯有滅亡者夫人

而欲救存之則先王之澤天下之公義也序績莫如公齊桓存三亡國必若救衛庶幾於公矣是故衛不言滅廬於曹也不言遷齊侯使公子無虧帥車三百乘甲士三千人戍曹不言救春秋之辭約而不迫者善辭也

夏四月辛巳葬我小君哀姜虞師晉師滅下陽

有傳并公羊穀梁傳

晉里克荀息也稱師何滅未嘗書大夫將也下陽號邑也滅下陽而後滅虢則其但書滅下陽何以爲晉人之罪徒滅其邑焉爾而虢自亡也

秋九月齊侯宋公江人黃人盟于貫冬十月不雨楚人侵鄭

三年春王正月不雨夏四月不雨有傳徐人取舒六月雨

秋齊侯宋公江人黃人會于陽穀冬公子友如齊泣

盟有公羊傳楚人伐鄭

四年春王正月公會齊侯宋公陳侯衛侯鄭伯許男曹伯侵蔡蔡潰

但言潰自潰也

昭二十九年鄭潰

伐潰伐者潰之也

成九年楚師伐莒莒潰

苟

亡矣自潰不足道也

僖十九年梁潰

苟滅之矣潰之不足道也

也

宣十二年蕭潰襄二十九年舒鳩潰

晉伐麇咎如麇咎如潰不書傳曰

上失民也言不徒罪晉也此桓公侵蔡也則其書潰何侵淺事也侵蔡而蔡潰焉爾薄齊之罪也

遂伐楚

春秋舉重凡師再有事不悉書

據成六年晉樂書救鄭遂
侵蔡但書救鄭八年晉樂

書侵蔡遂侵楚侵
沈但書侵蔡之類

苟悉書也則以遂言之兵事言遂必

關天下之大故也自入春秋楚浸強矣而不見於
經敗蔡師以蔡侯獻舞歸聖人懼焉而諸夏之交
兵非以定篡弒則修怨而已矣問不及楚也桓公
始有志於夷夏之分於是伐楚而以侵蔡召諸侯
書曰遂伐楚言志不在蔡也侵蔡遂伐楚以志齊
桓之伯侵陳遂侵宋以志楚莊之伯足以見夷夏
之盛衰矣

次于陘夏許男新臣卒楚屈完來盟于師盟于召陵

書屈完有
穀梁傳

凡次譏也此齊桓之師則其書次何用見桓之不
戰而誑楚也桓公合九國之眾以討楚兵未有盛
於此者也楚雖強足以一戰矣而臨楚不戰楚人
為之誑使其大夫即盟於師桓公不欲臨楚盟屈
完退而盟召陵不阻隘不以君違臣不以軍容亂
國容一動而三善得桓公不但以力服人矣春秋
之褒貶辭不足以盡意而後見於文書曰次于陘
楚屈完來盟于師盟于召陵斯其為文也美矣則
從其恒辭書次可也

齊人執陳轅濤塗

有公
羊傳

此齊侯也其稱齊人何貶也東遷之後諸侯始放

通志堂

春秋之治在諸侯而大夫不與北杏之後盟主始
專春秋之治在盟主而諸侯不與治在諸侯貶人
之是故於中丘會稱君伐宋稱人於郎戰稱君盟
惡曹稱人治在盟主貶人之是故於陘伐稱君於
執濤塗稱人於温會稱君於執衛侯稱人

秋及江人黃人伐陳八月公至自伐楚葬許穆公

凡諸侯卒於他國稱國

昭二十二年蔡侯襄二十六年許男

非國也則但

稱地

晉侯于扈宋公子曲棘

有諸侯之事焉則以其事卒之

曹伯于師祀伯

會此其不言卒于師何以其在桓師猶在國也於
是葬之以侯禮加二等

穀梁內桓師也

冬十有二月公孫茲帥師會齊人宋人衛人鄭人許

人曹人侵陳

會侵未有書帥師者而公孫茲書帥師會救未有

書帥師者而公孫敖書帥師公子牙與弒子般公

子慶父謀弒閔公而茲與敖皆世為將是故謹志

之曰子友帥師敗莒師於鄆公孫茲帥師會侵陳

公孫敖帥師及諸侯之大夫救徐見三家之所從

始也

五年春晉侯殺其世子申生

三傳同公羊穀梁直稱君例

於是太子緝於新城則其斥殺何春秋之法苟有
讒而不見則其君之罪也是故申生以驪姬之譖
自殺宋世子痤以伊戾之譖自殺直稱君殺而已

矣

杞伯姬來朝其子穀梁有傳夏公孫茲如牟公及齊侯宋公

陳侯衛侯鄭伯許男曹伯會王世子于首止有傳

諸侯何以會王世子定世子也於是子帶有寵於

惠后世子危不得立桓公率天下之諸侯以會之

世子危不得立而為會以定之禮之變者也然則

如之何而可殊會世子而不以世子夷於諸侯不

以世子夷於諸侯所以定世子也桓公可謂善處

父子之閒矣

秋八月諸侯盟于首止公羊前目後凡例

會而後盟閒有事書諸侯盟於某事在襄十九年祝柯二十五年重丘非

閒有事也亦書諸侯盟于某則有不盟者也此其

言諸侯則王世子不與盟也桓有諸侯之事三於

洮序王人於諸侯之上而同盟焉王人微者也雖

同盟而無嫌於葵丘亦序周公於諸侯之上而不

敢同盟焉天下之宰異於微者也盟于首止不但

不同盟也而帥諸侯以殊會世子以世子之尊非

特天子之宰比也桓公於是知節矣是故會有周

人盟無周人書會於某某日諸侯盟則齊桓之遜

也會有周人盟有周人書會于某但曰某日盟則

事在成十七年柯陵

鄭伯逃歸不盟

國君而曰逃賤之也何賤乎鄭伯以其背夏盟也

厥貉之會麋子逃歸不書事在文十年厲之役鄭伯逃歸

不書事在宣十一年蓋逃楚也必若鄭文公逃齊陳哀公逃

晉而後書所以示夷夏之辨嚴矣

楚人滅弦弦子奔黃

楚嘗有大夫屈完此鬪穀於菟也則其稱人何楚

大夫將恒稱人也

九月戊申朔日有食之冬晉人執虞公有傳公羊曰不與滅也

晉滅虞矣則其但書執何以爲晉人之罪徒執其

君焉耳而虞自亡也是故滅者亡國之善辭也上

下同力也苟同力致滅自其君世子必詳所以滅

之之罪書曰楚子虔誘蔡侯般殺之于申楚公子

弃疾帥師圍蔡楚師滅蔡執蔡世子有以歸用之

苟不同力執其君而國從之矣則不詳所以滅之

之罪書曰晉人執虞公以爲晉人徒執其君焉耳

而虞自亡也

六年春王正月夏公會齊侯宋公陳侯衛侯曹伯伐

鄭圍新城

伐國不言圍邑本穀梁例此其言圍何以桓公合六國之

衆徒圍其邑焉耳自僖而下必圍國而後書邑不

足書也

秋楚人圍許

此楚子也其稱人何楚君將恒稱人也

諸侯遂救許

於是蔡穆侯將許僖公以見楚子於武城許男面縛銜璧大夫衰經士輿櫬此所以書救許也

冬公至自伐鄭

七年春齊人伐鄭夏小邾子來朝鄭殺其大夫申侯秋七月公會齊侯宋公陳世子款鄭世子華盟于甯母曹伯班卒公子友如齊冬葬曹昭公

八年春王正月公會王人齊侯宋公衛侯許男曹伯陳世子款盟于洮

王人者何微者也序微者於諸侯之上雖同盟無

譏焉耳

鄭伯乞盟夏狄伐晉秋七月禘于太廟用致夫人有傳

此哀姜也曷不稱姜氏絕之也哀姜得罪於吾君

而猶致於廟絕哀姜所以惡僖公也向曰夫人氏

而不言姜見絕於其國之辭也今日夫人而不言

氏見絕於宗廟之辭也是故魯禘非禮也雖用之

羣公之廟不書據禘于襄公禘于僖公之類有用之羣公之廟書者

矣但曰有事譏不在用禘也事在昭十五年必禘於太廟致

哀姜也而後書譏在用禘也

冬十有二月丁未天王崩

九年春王三月丁丑宋公御說卒傳例非是說在章指夏公會宰周

陳氏春秋後傳卷五

通志堂

公齊侯宋子衛侯鄭伯許男曹伯于葵丘

天子之三公也桓嘗殊會王世子則其不殊會三公何春秋是以子桓也春秋之子桓奈何桓之會有天子之事三於洮序王人於諸侯之上而同盟焉於葵丘亦序周公於諸侯之上而不敢同盟焉盟于首止不但不同盟也而帥諸侯以會世子桓知節矣春秋是以子桓也

秋七月乙酉伯姬卒九月戊辰諸侯盟于葵丘

此其言諸侯則宰周公不盟也

甲子晉侯嵬諸卒冬晉里克殺其君之子奚齊有傳

遇弒雖未逾年稱君據齊舍此其稱君之子何獻公殺

申生絀重耳夷吾而立其嬖子晉之亂獻公爲之也是故奚齊不稱君而稱君之子

十年春王正月公如齊狄滅溫溫子奔衛晉里克弒

其君卓及其大夫荀息有公羊傳夏齊侯許男伐北戎晉殺

其大夫里克公羊惠公之大夫也

討賊不言大夫其曰晉殺大夫里克何克猶在位也克猶在位則是殺大夫耳在位獨里克乎督相宋莊翬相魯桓前乎此矣於是里克殺以他故而後見焉耳自宋萬而下弒君無討者凡賊再見猶夫人也雖若晉里克衛甯喜殺以他故而後見書曰大夫則猶夫人而已矣是故自里克迄春秋賊

皆書氏族亂臣賊子無以異於夫人矣通國以為賊吾從而志之以為賊通國以為夫人我從而志之以為夫人我何加損焉實錄而已是經之大變也雖然有荀息在焉則猶有臣子也杜自莊以上諸弑君者皆不書氏自閔以下諸弑君者皆書氏明時史之異同非仲尼所成也非是

秋七月冬大雨雪

十有一年春晉殺其大夫平鄭父夏公及夫人姜氏會齊侯于陽穀秋八月大雩冬楚人伐黃

十有二年春王三月庚午日有食之夏楚人滅黃滅不言伐此其書伐何病桓公也以陽穀之會貫之盟徒以亡其國焉耳

秋七月冬十有二月丁丑陳侯杵臼卒

十有三年春秋侵衛夏四月葬陳宣公公會齊侯宋


公陳侯衛侯鄭伯許男曹伯于鹹秋九月大雩冬公子友如齊

十有四年春諸侯城緣陵有傳并穀梁傳

諸侯不序必前目而後凡也非前目而後凡也而不序者散辭也本穀梁及范甯是故但曰諸侯者不繫之伯者之辭也但曰大夫者不繫之君之辭也梁

夏六月季姬及鄆子遇于防使鄆子來朝

朝未有言使者則其曰季姬使鄆子來朝何惡魯而賤鄆子也於是季姬來寧公以鄆子之不來朝



也怒止之遂遇於防使朝焉魯為已汰鄆為已卑矣於婦人乎何譏惡魯而賤鄆子也

秋八月辛卯沙鹿崩有公羊傳狄侵鄭冬蔡侯肝卒

十有五年春王正月公如齊楚人伐徐三月公會齊侯宋公陳侯衛侯鄭伯許男曹伯盟于牡丘遂次于匡

救不言次言次無志於救也楚伐徐桓公合七國之眾以救之而使大夫將有諸侯在而大夫將於是始桓公為之也則桓志荒矣而卒不競於楚是故凡救譏也言次甚譏之也有諸侯在而使大夫將始於牡丘桓公為之也有諸侯在而使大夫盟

始於雞澤悼公為之也

公孫敖帥師及諸侯之大夫救徐

書救徐何徐卒敗於楚也會救未有書帥師者其稱帥師何公子慶父弒閔者也而敖世為將是故謹志之曰公孫帥師見三家之所從始也

夏五月日有食之有秋七月齊師曹師伐厲八月螽九月公至自會季姬歸于鄆

內女嫁恒書歸不書歸必有故也季姬來寧公怒而止之故不書歸至是而後言歸也

己卯晦震夷伯之廟穀梁有傳冬宋人伐曹

諸夏之相加兵自莊公之十九年始前此未之有

也於是再見宋襄公為之也

楚人敗徐于婁林

夷狄交相敗不書

據傳襄十三年楚人敗吳師獲公子黨十四年楚伐吳吳人敗之獲公子宜穀之類必

敗中國而後書徐戎也何以書病齊也齊帥天下

之諸侯以攘戎狄存中國也楚伐徐桓公合七國

之眾盟于牡丘次于匡以救徐為之伐厲而徐卒

敗於楚人不數年宋楚爭盟執宋公以是為盟主

病矣

十有一月壬戌晉侯及秦伯戰于韓獲晉侯

於是秦獲晉侯以歸則其不曰以歸何罪晉侯也

獲匹夫之辭也言獲則以歸不足言也是故獲夷

狄不書

據傳卻缺獲白狄子叔孫得臣獲長狄

夷狄交相獲不書

據傳楚獲吳公子黨吳獲楚公

子宜穀皆不足書也必大國也將尊而師眾若宋華元

齊國書斯可以言獲矣宋大國也將尊而師眾獲

之若匹夫然猶曰宋齊之恥晉甸侯也而言獲是

夷晉侯於大夫也

十有六年春王正月戊申朔隕石于宋五是月六鷄

退飛過宋都

有公羊傳

三月壬申公子季友卒

大夫卒恒稱名則其兼字之何見三桓之所自始

也自是季氏世為卿也故譏之

本劉氏

夏四月丙申鄆季姬卒秋七月甲子公孫茲卒冬十

有二月公會齊侯宋公陳侯衛侯鄭伯許男邢侯曹

伯于淮

十有七年春齊人徐人伐英氏夏滅項

於是公猶在齊非公命也向也費伯帥師城郎非公命不書此何以書城郎常事滅項非常也是故必常事也譏不及公則不書苟非常則謹書之書滅項失兵權之漸也襄公在晉書邾庶其來奔昭公在晉書莒牟夷來奔雖非公命皆非常也春秋之季大夫不稟命於諸侯非但魯也鄭伯會于夷儀鄭公孫舍之帥師入陳事在襄二十五年蔡侯會于召陵蔡公孫姓帥師滅沈春秋必謹而志之也

秋夫人姜氏會齊侯于卞九月公至自會有冬十有二

月乙亥齊侯小白卒

十有八年春王正月宋公曹伯衛人邾人伐齊夏師

救齊

書救齊何齊卒敗於宋也

五月戊寅宋師及齊師戰于甌齊師敗績

此宋公也其稱師何於是齊桓公與管仲屬孝公於宋襄公以為太子而桓公卒寺人貂立公子無虧孝公奔宋襄公以諸侯之師伐齊立孝公而還春秋貴義不貴惠尚治不尚功託人之孤而動天下之兵至於交戰是伐喪而已矣雖然孝公不言納孝公言納則疑於齊糾邾捷菑宋襄之義僅異

東

通志堂

於魯莊晉趙盾而已

狄救齊秋八月丁亥葬齊桓公冬邢人狄人伐衛

狄始稱人

本穀梁

十有九年春王三月宋人執滕子嬰齊

執不言歸未失國之辭也

據成九年鄭伯襄十六年莒子邾子十九年邾子哀四年小邾子

歸危不得歸也是故執君不名歸然後名之執稱

曹伯歸稱曹伯襄執稱衛侯歸稱衛侯鄭此執也

則其名何遂失國也舍滕子嬰齊戎蠻子赤則皆

未失國者也虞公失國則其不名何也虞自亡矣

晉人之罪徒執其君焉爾不於執焉加以遂失國

之辭所以見虞之自亡也

嬰齊遂失國本孫氏

夏六月宋公曹人邾人盟于曹南

邾文公在焉則其稱人何人曹邾以貶宋也屬辭

疑於北杏曷為謂之貶以明年鹿上之盟亦人宋

則未嘗予宋以伯也襄公欲合諸侯而執滕宣公

使邾文公用鄆子一會而虐二國之君而亟與楚

盟是喪師亡身之道也

鄆子會盟于邾已酉邾人執鄆子用之

說見齊殺子糾

秋宋人圍

曹

此宋公也其稱人何凡圍國雖君將貶人之前年

齊桓卒宋公欲合諸侯而亟修怨於曹諸夏之書

圍國自此始

衛人伐邢冬會陳人蔡人楚人鄭人盟于齊

楚初與諸夏盟也內不言公諱之也齊桓卒陳非

盟主也則曷為會陳人春秋不以夷狄會中國則

推而屬之陳也楚稱人猶未有君也以其人楚不

可不人陳蔡以其人陳蔡不可不沒公也據傳陳穆公

梁亡有傳及穀梁傳

二十年春新作南門有傳例夏郟子來朝五月乙巳西宮

災鄭人入滑

此鄭公子士洩也不書大夫將恒稱人也

秋齊人狄人盟于邢冬楚人伐隨

二十有一年春秋侵衛宋人齊人楚人盟于鹿上

人自為盟於惡曹見之於是再見其再見何中國

無伯也齊故伯也桓卒宋襄公欲繼之伯而求諸

侯於楚楚於是爭長於宋則是盟也莫適為主人

自為盟而已矣

夏大旱秋宋公楚子陳侯蔡侯鄭伯許男曹伯會于

孟執宋公以伐宋

宋楚初爭長也是故楚稱子而序於陳蔡鄭許曹

之上不知諸侯之從楚與從宋與不予宋以伯也

凡執恒稱人執之於伐則伐稱君執稱人據齊人執陳轅濤塗之類

於會則會稱君執稱人據晉執衛侯之類雖大夫也則亦會稱

大夫執稱人據韓不信執宋仲幾執不稱人執有罪也此楚子執

宋公則曷為不再言楚人，不以夷狄執諸夏之辭，也是故執宋公不申言楚人執齊慶封亦不申言楚人，猶曰諸侯執之焉爾。

冬公伐邾，楚人使宜申來獻捷。

君使大夫何以特稱人貶之也？孟會稱子矣，獻捷於魯，何以貶人之？孟會不稱子，無以見楚宋之爭長，獻捷於魯，不人之，則是遂予楚也。自是至椒之聘而後始有君大夫於以見春秋之許夷狄也。

十有二月癸丑公會諸侯盟于薄，釋宋公。

外釋不志。

本穀梁傳例據傳僖二十八年以專釋衛侯但書歸。

此何以志以宋公為無

歸道也是故執不言歸者善辭也，言歸危辭也不

言歸言釋直釋之，爾無歸道也。向也楚初與盟不

書公於是書公不予楚以專釋之辭也。

本穀梁

二十有二年春公伐邾取須句。

春秋嚴義利之辨，苟以為利一以取書之是故雖

邾人滅須句，須句子來奔，伐邾取須句反其君焉。

書取須句雖莒著丘公立而不撫鄆，鄆叛而來書

取鄆。

夏宋公衛侯許男滕子伐鄭，秋八月丁未及邾人戰

于升陘，冬十有一月己巳朔宋公及楚人戰于泓，宋

師敗績。

有穀梁傳

楚嘗有君矣，此楚子也，其稱人何？楚君將猶稱人

也

二十有三年春齊侯伐宋圍緡夏五月庚寅宋公茲父卒秋楚人伐陳

此成得臣也不書楚大夫將猶稱人也

冬十有一月杞子卒

有傳凡例非是說在章指

二十有四年春王正月夏狄伐鄭秋七月冬天王出

居于鄭

有傳

王出不書為尊尊諱也

據莊二十年惠王處櫟定六年敬王處姑舊

其言出居

于鄭何以為無足諱焉耳子頹之難惠王未有過也鄭虢圖之執燕仲父殺子頹逾年而復辟故諱之也襄王以狄伐鄭富辰諫弗聽又德狄以狄女

為后諫弗聽子帶以狄師攻王王御士將禦之又

弗聽於是適鄭書曰天王出居于鄭以為無足諱

焉耳雖然猶未書入也春秋善復正言入未足以

言復正也襄王書出矣已而書王許書滅矣

事在定六年

已而書許男

事在哀元年

必如是而後可以言復正也

晉侯夷吾卒

二十有五年春王正月丙午衛侯燬滅邢

三傳同

夏四月

癸酉衛侯燬卒宋蕩伯姬來逆婦

本劉氏

公自主之也

宋殺其大夫

無傳

秋楚人圍陳納頓子于頓

出罪也納之者亦罪也則悉書之

據北燕伯款衛世子蒯瞶

出非其

罪納之者罪也則但書納齊桓公卒楚始與諸夏盟于齊盟于鹿上執宋公納頓子侈然欲廢置諸侯矣春秋之所懼也

葬衛文公冬十有二月癸亥公會衛子莒慶盟于洮

有穀梁傳

二十有六年春王正月己未會莒子衛甯速盟于向齊人侵我西鄙公追齊師至鄆不及

此齊侯也其稱人何自隱以來以兵加我君大夫將皆書人君將書君自文十五年齊懿公始大夫將書大夫自襄十七年齊高厚始訖春秋惟莒邾書人

夏齊人伐我北鄙衛人伐齊公子遂如楚乞師

乞師不書

據成二年臧宣叔如晉乞師

乞諸夷狄然後書外乞師亦

不書必盟主也而後書乞卑辭也乞諸夷狄然後書志中國之誣於夷狄也

秋楚人滅夔以夔子歸

滅同姓名此楚子頹也則其不名何楚子之名未登於春秋也楚自武王始見於傳文王始見於經猶以州舉也至成王而後書楚人孟之會嘗書楚子矣而復人之頹之名非遇弒未登於春秋則滅夔固不名也滅夔名之則疑於衛侯燬不名楚子則不名夔子也

冬楚人伐宋圍緡公以楚師伐齊取穀傳例說在章指公至自伐齊

二十有七年春杞子來朝有傳夏六月庚寅齊侯昭卒秋

八月乙未葬齊孝公乙巳公子遂帥師入杞冬楚人

陳侯蔡侯鄭伯許男圍宋

有穀梁傳

楚嘗有君矣據會于孟此楚子也據傳則其稱人何嫌予楚以

伯也盟于齊楚猶序陳蔡之下於鹿上猶不先齊

宋也孟之會宋楚始並為諸侯長矣楚之稱子而

長於諸侯宋襄公為之也魯僖衛文夫子之刪詩

有取焉桓公卒而衛從楚魯又從楚楚敗宋于泓

納頓子滅夔取齊之穀且合四國之君以圍宋春

秋以是為夷狄之強而已矣雖序於諸侯之上而

特人之不稱人則疑於莊王

十有二月甲戌公會諸侯盟於宋釋宋公

二十有八年春晉侯侵曹晉侯伐衛公子買戍衛不

卒戍刺之楚人救衛

楚嘗救鄭矣不書

見傳僖六年二十二年

於是始書以為晉文之

伯楚欲救而不能也

三月丙午晉侯入曹執曹伯畀宋人

入雖君將貶人之此其稱晉侯何必若晉文入曹

而後可以無貶也

夏四月己巳晉侯齊師宋師秦師及楚人戰于城濮楚

師敗績

此宋公齊國歸父秦小子憖也宋公也則何以但稱師尊晉侯也尊晉者予晉以伯也楚得臣何以稱人楚未有大夫將也

楚殺其大夫得臣

於是楚子使止子玉曰母死不及則其斥殺何春秋之法苟有誅意於其臣雖自殺也書殺是故楚得臣公子側皆書殺而已矣

衛侯出奔楚五月癸丑公會晉侯齊侯宋公蔡侯鄭伯衛子莒子盟于踐土

序晉侯於齊侯宋公之上予晉以伯也於是王子

虎實盟諸侯則其不書何凡王人涖盟不書

據宣七年王叔

桓涖伐不書

據文三年王叔桓公成十三年劉康公成肅公

陳侯如會公朝于王

有穀梁傳

此踐土之諸侯也外朝王不書

據隱六年鄭伯八年齊鄭莊十八年晉虢

書魯

以見其餘也於是晉侯將盟于踐土而王即命為方伯諸侯朝焉則先朝而後盟曷為先書盟後書朝書朝而後盟是以天子與斯盟也書盟而後朝春秋不以天子與斯盟之辭也

穀梁諱會天王也

六月衛侯鄭自楚復歸于衛

君歸不言自必大夫也而後言自人臣無專歸之道也君而言自者危不得歸也是故晉文實復衛

侯而曰自楚危自楚也晉厲實歸曹伯而曰自京師危自京師也

衛元咺出奔晉陳侯款卒秋杞伯姬來

義見莊二十七年

公子遂如齊冬公會晉侯齊侯宋公蔡侯鄭伯陳子

莒子邾子秦人于溫天王狩于河陽有傳

王狩不書本公羊傳據莊二十一年王巡守號此何以書非狩也於是晉

侯將會於溫召王以諸侯見而以狩書也王有事

譏不在諸侯則以自致之文書之此晉侯之罪爾

則曷為以自狩為文為尊尊諱也晉侯將會于溫

召王以諸侯見則先狩而後會曷為先書會後書

狩書狩而後會是以天子與斯會也先書會後書

狩春秋不以天子與斯會之辭也穀梁諱會天王也

壬申公朝于王所有穀梁傳

朝踐土不繫日此繫日何見先狩而後朝也王嘗

至踐土而不言狩則王意也至溫非王意也至踐

土王意也則可以但言朝至溫非王意也則不可

以但言朝故書曰天王狩于河陽壬申公朝于王

所朝而繫日雖諱而諸侯致天子之實見矣齊桓

公盟王人不盟宰周公殊會世子晉文公實致天

子而朝之故曰齊桓公正而不譎晉文公譎而不

正

晉人執衛侯歸之于京師

於是命晉侯為伯矣執衛侯是伯討也則其稱人何非王命也樊皮叛王王命虢公討之虢公入樊執樊仲皮歸于京師不書是故凡執譏也春秋猶以當乎罪不當乎罪為褒貶苟當乎罪雖晉厲公執曹伯得為伯討苟不當乎罪雖齊桓執陳轅濤塗稱人而已矣

衛元咺自晉復歸于衛

歸大夫不言復必諸侯也而後言復君有歸道也大夫言復者仇也是故元咺復歸宋魚石晉欒盈復入皆仇辭也

諸侯遂圍許曹伯襄復歸于曹

執君不言歸言歸危不得歸也

遂會諸侯圍許

二十有九年春介葛盧來

介東夷也且書來者也昔者衛侯來會惠公葬隱公不見不書今公猶在會亦不見介人則何以書介東夷也未通於上國一歲再至其意將安在乎故亟書之介人侵蕭譏有以來之也

公至自圍許夏六月會王人晉人宋人齊人陳人蔡

人秦人盟于翟泉

有傳

此晉狐偃宋公孫固齊國歸父陳轅濤塗也曷為

不序晉初以大夫盟王子也向也踐土之役王子
 虎不書蒞盟也今以大夫盟王子文公之志荒矣
 大夫之交政於是始文公為之也不斥言王子虎
 為尊尊諱也以其人王子虎不可不徧人諸侯之
 大夫以其徧人諸侯之大夫不可不沒公也是故
 齊初主盟不言公莊十六年盟齊楚向與盟不言公僖十九年盟齊晉大
 夫初會盟不言公皆譏不在魯也

秋大雨雹冬介葛盧來

春秋以一字為褒貶於介乎何費辭也春秋雖以
 一字為褒貶而或費辭者詳始以著末也三月癸
 酉大雨震電庚辰大雨雪正月己卯烝夏五月丁

丑烝將著其末不可不詳其始也

三十年春王正月夏狄侵齊秋衛殺其大夫元咺及

公子瑕衛侯鄭歸于衛

向也言復歸今歸不言復何奔失國之辭也執來

失國之辭也凡執不言歸成九年鄭伯襄十六年莒子邾子十九年邾子執而言

歸危不得歸也是故執君不名歸然後名之執書

衛侯歸書衛侯鄭執書曹伯歸書曹伯襄名之者

亦失國之辭也

晉人秦人圍鄭

此晉侯秦伯也曷為貶稱人晉帥天下之諸侯以
 攘戎狄存中國也而圍鄭鄭未有罪焉爾於是秦

伯私與鄭盟戍鄭而去之子犯請擊秦晉侯曰微夫人之力不及此吾其還也蓋秦晉之怨自此始介人侵蕭冬天王使宰周公來聘公子遂如京師遂如晉

自桓王以下王室無聘魯者於是再聘而宰周公實來則已尊矣公子遂如京師遂如晉以其如京師不敢不如晉是夷周於晉也吾大夫如京師不

書據魯頌季孫行父於是始書之聘周非常事矣

三十有一年春取濟西田公子遂如晉夏四月卜郊不從乃免牲猶三望有傳公羊傳

諸侯之有郊禘東遷之僭禮也故曰秦襄公始列

於諸侯作西時祠白帝僭端見矣位在藩臣而臚

於郊祀君子懼焉則平王以前未有也魯之郊禘

惠公請之也據邵氏經世書惠公止於秦襄公祠白帝之年齊桓公欲封禪而晉亦

郊鯨皆僭禮也然則春秋何以始見於僖公向者

莊公之觀齊社也曹劌諫曰天子祀上帝諸侯會


之受命焉諸侯祀先王先公卿大夫佐之受事焉

用見惠公雖請之而魯郊猶未率為常也僖公始

作頌以郊為夸焉於是四卜不從猶三望是故特

書之以其不勝譏譏其甚焉者爾記禮者以為魯禮皆成王賜之以康周公案衛

祝鮀之言曰周公相王室以尹天下於周為睦分魯以大路大旂夏后氏之璜封父之繁弱殷民六族以昭周公之德分之土田陪敦祝宗卜史備物典策官司彝器則成王命魯不過如此隱公考仲子之宮問羽數於眾仲周公閱來聘饗有昌歆白黑形鹽周公以為備物辭不敢受衛甯武子



來聘宴之賦湛露及彤弓武子不答賦曰諸侯朝正於王於是乎賦湛露諸侯敵王所愾而獻其功於是乎賜之彤弓陪臣其敢干大禮以自取戾假如明堂位之言得用郊禘兼四代服器官祝鮀不應不及況魯行天子之禮久矣則羽數何以始問於隱公昌歆形鹽以之饗天子之上公安用固辭湛露彤弓甯武子何以不答且致譏焉於以見魯僭未久上自天子之宰至於兄弟之國之卿苟有識者皆云魯遜謝而魯人並無一語及於成王之賜以自解用郊禘之說當從劉恕太史公博極羣書定以為僭郊禮始於秦襄而恕亦該洽儻自史角之事之外有傳記與明堂位之禮合則外紀豈獨遺佚乎

秋七月冬杞伯姬來求婦狄圍衛十有二月衛遷于帝丘

三十有二年春王正月夏四月己丑鄭伯捷卒衛人侵狄秋衛人及狄盟冬十有二月己卯晉侯重耳卒三十有三年春王二月秦人入滑齊侯使歸父來聘夏四月辛巳晉人及姜戎敗秦師于殽

外相敗不書

據成三年諸侯伐鄭鄭敗諸丘與四年鄭疆許田許敗之展陂之類

此何以書惡晉

也晉之伯秦有力焉自城濮以來無役不從也文公未葬襄公墨衰及姜戎氏要秦師於殽敗之夫晉帥天下之諸侯以攘戎狄存中國也秦有力焉而及姜戎敗之秦晉之構怨自是始更三君交兵無虛歲曾不十年晉遂不競而楚伯是故外會師而不及據隱五年邾鄭伐宋成九年秦人自狄伐晉之類特書及而晉侯貶稱人本穀然則善秦與自韓原秦師無君大夫則非善秦也晉遂不競而楚伯秦亦與有力焉耳

癸巳葬晉文公狄侵齊公伐邾取訾婁秋公子遂帥師伐邾晉人敗狄于箕



中國敗夷狄不書據隱九年鄭人大敗戎師唯晉特書之

特書晉者皆病晉也故晉侯貶稱人晉帥天下諸

侯以攘戎狄存中國也前年狄侵齊去年狄侵衛

衛為之遷帝丘而晉不能救於是伐晉蓋僅而後

勝之也晉侯稱人以是為盟主病矣

冬十月公如齊十有二月公至自齊乙巳公薨于小

寢左氏穀梁傳同隕霜不殺草李梅實晉人陳人鄭人伐許

陳止齋先生春秋後傳卷第五

後學 成德 校訂

陳止齋春秋後傳卷第六

文公

元年春王正月公即位二月癸亥日有食之天王使

叔服來會葬夏四月丁巳葬我君僖公天王使毛伯

來錫公命

自隱至文六君惟桓文書即位而後書錫命以其

自即位也

晉侯伐衛

於是晉告於諸侯而伐衛先且居曰效尤禍也請
君朝王臣從師晉侯朝王於温先且居胥臣伐衛
則其但書君何春秋罪戎首苟其君意雖御帥不

書是故伐衛書晉侯不書先且居伐秦書晉侯不書

藥書事在成十三年滅偃陽書晉侯不書荀偃士句襄十年伐晉

書衛侯不書孔圉哀元年所謂春秋深探其本也春秋

雖罪戎首而宥不得已是故小國役大國往往不

書伐齊之役邾郟不書事在哀十年滅陳書楚不書宋戴

惡也

叔孫得臣如京師衛人伐晉

此衛孔達也其稱人何大夫將猶稱人也

秋公孫敖會晉侯于戚冬十月丁未楚世子商臣弒

其君頹

楚卒未志據傳楚武王卒于莊四十九年其志頹何世子弒君不可

以楚不志也

公孫敖如齊

二年春王二月甲子晉侯及秦師戰于彭衙秦師敗

績

此孟明視也其稱師何秦未有大夫也

丁丑作僖公主有傳凡例說在章指三月乙巳及晉處父盟有傳公羊穀梁同

朝而遂盟之於是始傳曰適晉不書諱之也凡諱

國惡耻在公則但書其事不書公者恒辭也諱在

其事則但書公不書其事公會晉侯于黑壤為公

不與盟故不書盟宣七年有傳公如晉為止公送葬故不

書葬成十年皆有傳甚諱之也會晉師于上鄆削而不書諱

不足以盡之矣是故諱有愛君之誼焉必譏不及君而後諱舍是無諱道矣故曰諱莫如深也

夏六月公孫敖會宋公陳侯鄭伯晉士穀盟于垂隴

有傳穀梁內大夫可
以會外諸侯非是

晉遂以大夫盟諸侯也大夫而與諸侯敵於是始故書大夫專盟自士穀也士穀非卿也特書之見晉之卑諸侯也然則士穀主是盟也則曷為序士穀於諸侯之下春秋不以大夫主盟也是故訖于宋不以大夫主盟翟泉貶此何以不貶貶不於其甚則於事端餘實錄而已矣是故書士穀自書士穀而后凡役書大夫桓文之伯也會盟有大夫則

但稱人據僖元年會稽邾人二
十八年會溫秦人之類必世子也則得次小國之

君自垂隴主士穀新城主趙盾而后大失與諸侯

序於是戚之盟書齊國佐成十
五年沙隨之會書宋華元

成十
六年甚者無伯而君與大夫並列於會矣定十年齊侯衛
侯鄭游速會于

甫安

自十有二月不雨至于秋七月八月丁卯大事于太

廟躋僖公三傳同大事
從公穀傳冬晉人宋人陳人鄭人伐秦傳言尊
秦非經

意

嘗書大夫矣此晉先且居宋公子成陳轅濤塗鄭公子歸生也曷為不序大夫將猶稱人也自士穀專盟書大夫自陽處父專將書大夫是故春秋之

始大夫將恒稱人由救鄭之後大夫始貶稱人矣

公子遂如齊納幣

公羊有傳左氏凡例不取杜說尤悖

三年春王正月叔孫得臣會晉人宋人陳人衛人鄭

人伐沈沈潰

傳例說在章指

夏五月王子虎卒

說在莊二十二年公穀以為叔服非是

秦人伐晉

此秦伯也曷為貶稱人殺之誓孔子有取焉而秦穆之連兵無虛歲君子以為秦之未離乎戎狄也是故自韓原秦不以爵見於經至康公而遂狄之終南蒹葭之作秦非無人也而秦不用誠未離乎戎狄也

秋楚人圍江雨蝨于宋冬公如晉十有二月己巳公

及晉侯盟晉陽處父帥師伐楚以救江

晉大夫書帥師於是始大夫強也處父盟魯侯以王叔桓公伐楚蒐於董易中軍是故雖荀息里克不言帥師僖二年必若處父而后言帥師自是恒書大夫貶而后人之書救何江卒滅於楚也向也曰晉處父今日晉陽處父命大夫也是故自郟黎來為小邾子無未命諸侯潞子戎蠻子皆有君矣自晉處父為陽處父無未命大夫曹公子首邾庶其皆有大夫矣文宣之後大夫舍宋山無去其氏諸侯舍杞子無黜其爵者皆春秋之變文也

四年春公至自晉夏逆婦姜于齊

有傳穀梁成禮於齊非是

狄侵齊秋

楚人滅江

滅不言圍此其書圍何以病晉也陽處父伐楚以救江而江卒滅於楚言圍見其久也久之所以病晉也僖之三十二年楚鬬章請平于晉晉陽處父報之晉楚始通文公為之也

晉侯伐秦衛侯使甯俞來聘冬十有一月壬寅夫人風氏薨

夫人某氏薨嫡稱也此莊公之妾也則曷為以嫡稱稱之喪之以夫人之禮也隱公之喪桓母猶有疑焉是故別廟也祔姑稱謚佯然如夫人則自文公之喪成風始也

五年春王正月王使榮叔歸含且賵

以成風之喪赴京師也賵常事不書唯賵仲子成風特書之則遂命為夫人也春秋之初猶以是為非常事也宣之敬嬴襄之定姒昭之齊歸雖命之為夫人不復書矣孟子卒則不赴於京師孔子曰夫人之不命於天子自魯昭公始也

三月辛亥葬我小君成風王使召伯來會葬

王不稱天於追錫桓公見之至是再見其再見何以夫人之禮喪成風也莊僖之際天下知有盟主而已而襄王之季年更有事於諸侯於是叔服會葬毛伯錫命尤汲汲於魯也尤汲汲於魯而何為

乎成風一人贈含之一人葬之以是懷諸侯吾見周之益陵夷也宰咺嘗以贈妾母貶則召伯何以不貶王公一體也宰書名則王不待貶而自見王不稱天則召伯不待貶而自見也文武之教著於南雅莫急於君夫人也桓以少篡長成風以庶亂嫡王道熄矣而莊襄不能正又從而褒賞之是以天命施之天討也是故皆不稱天

夏公孫敖如晉秦人入郟秋楚人滅六冬十月甲申許男業卒


六年春葬許僖公夏季孫行父如陳秋季孫行父如晉八月乙亥晉侯驪卒冬十月公子遂如晉葬晉襄

公晉殺其大夫陽處父有傳說在章指晉狐射姑出奔狄

兩下相殺不道於是狐射姑使續鞠居殺陽處父則其書國殺何春秋之法苟有賊而不知則其君之罪也晉蒐于夷使狐射姑將中軍陽處父改蒐于董易中軍襄公無討焉於是使續鞠居殺陽處父是故晉胥童殺三郤藥書中行偃殺胥童齊崔杼殺高厚鄭子展子西殺公子嘉皆稱國而已矣閏月不告月猶朝于廟

七年春公伐邾三月甲戌取須句遂城郟夏四月宋公王臣卒宋人殺其大夫有傳殺梁誅有罪也非是

此公孫固也則其不名何昭公之大夫也昭公新



立曷為於此焉不名其大夫是春秋之大變也自
 隱而下春秋治在諸侯天子無道則不徒罪諸侯
 也於是有宰書名王子書名甚者王不書天自文
 而下春秋治在大夫諸侯無道則不徒罪大夫也
 於是有弑君稱人甚者稱國弑君天下之元惡也
 舍賊而稱人自宋昭公始是春秋之大變也是故
 終昭公之世不名其大夫春秋有天下之辭焉有
 一國之辭焉有一人之辭焉於晉靈公凡會盟皆
 不序諸侯是天下之辭也於魯莊公凡會齊襄皆
 書人是一國之辭也於魯桓公凡大夫將皆不言
 大夫於宋昭公凡大夫皆不名是一人之辭也

戊子晉人及秦人戰于令狐

晉將嘗書大夫此趙盾及秦伯也曷為貶稱人秦
 晉之交兵於是再世自令狐之後連兵不悉書矣
 於八年秦伐晉取武城不書于十年晉伐秦取少
 梁不書晉襄公卒欲立長君逆公子雍于秦秦康
 公以兵送之晉禦秦師則康公何貶焉春秋貴誼
 不貴惠尚治不尚功托人之孤至於交戰是亦伐
 喪而已矣是故宋襄公立齊孝公戰于甌貶人之
 秦康公送晉公子雍戰于令狐貶人之

晉先蔑奔秦

不言出從公穀

狄侵我西鄙秋八月公會諸侯晉

大夫盟于扈

傳例說在章指

東氏春秋後傳卷六

通志堂

垂隴嘗書士穀而序諸侯此公會齊侯宋公衛侯
 陳侯鄭伯許男曹伯晉趙盾也則何以不序晉始
 失伯也凡稱諸侯必先目而後凡也前有王人後
 無王人書曰諸侯盟于某則王人嘗不與也據首止王世子
葵丘宰前無吾君後有吾君書曰公會諸侯盟于某
周公則吾君嘗不與也據僖二十一年盟薄二十七年盟宋未始有不與者也而
 但曰諸侯一從而再有事也僖二十八年圍許襄十八年盟重丘非
 一役而再有事則非凡辭也非凡辭者散辭也
 冬徐伐莒公孫敖如莒泣盟

八年春王正月夏四月秋八月戊申天王崩冬十月
 壬午公子遂會晉趙盾盟于衡雍乙酉公子遂會雒

戎盟于暴有傳公孫敖如京師不至而復丙戌奔莒
 宋人殺其大夫司馬有傳

此公子邛也則其不名何昭公之大夫也於是襄
 夫人因戴武之族以殺大司馬公子邛則何以稱
 人稱人殺有罪之辭也六卿和公室樂豫舍司馬
 以讓公子邛則曷為例之以有罪不名所以別其
 非有罪也不名所以別其非有罪則稱人衆辭也
 宋司城來奔有傳

大夫奔恒名之此蕩意諸也則其不名何昭公之
 大夫也凡奔非其罪不書苟接我也不可以不書
 則不以同名之例書之是故未有書官者於是官

東天春秋後傳卷六

通志堂

從其官司馬司城是也未有書字者於是字從其

字據宋子哀

九年春毛伯來求金有傳公羊傳

自是魯雖不修貢周無求矣周室益衰而頃王之

崩葬不見於經

夫人姜氏如齊二月叔孫得臣如京師辛丑葬襄王

王喪卿共喪事不書此何以書夷周于晉也前年

公子遂葬襄公今年叔孫得臣葬襄王是夷周于

晉也是故苟常事雖季孫行父請命不書苟非常

也雖叔孫得臣會葬書

晉人殺其大夫先都三月夫人姜氏至自齊晉人殺

其大夫士穀及箕鄭父楚人伐鄭公子遂會晉人宋

人衛人許人救鄭

兵將嘗書大夫此晉趙盾宋華耦衛孔達也曷為

貶稱人晉遂不競而楚莊伯也傳曰卿不書緩也

以懲不恪是故凡救不書必救而無功然後書救

非善辭也自是而救不勝譏矣

夏狄侵齊秋八月曹伯襄卒九月癸酉地震冬楚子

使椒來聘有公羊傳

自孟之會楚復稱人此其稱楚子何以其能聘也

秦人來歸僖公成風之禴

成風祔姑稱謚佯然如夫人矣其曰僖公成風修

春秋之辭也夫人風氏薨葬我小君成風未修春秋之辭也由成風而下宣母敬嬴襄母定姒皆從舊史之文實錄而已

葬曹共公

十年春王三月辛卯臧孫辰卒夏秦伐晉

狄秦也歸成風之祿使術來聘秦習於禮矣則其狄之何楚之伯秦之力也自滅庸以後秦為楚役自晉主諸夏之盟舍秦無加兵於晉者也會于夷儀之歲秦晉成而不結又明年盟於宋而南北之勢成楚子曰釋齊秦他國請相見也是戰國之萌也於次國風退秦於魏唐之後於序書系秦於周

未於作春秋由韓原之後秦帥無君大夫皆夫子所以深致意於秦也吾聞用夏變夷矣未聞變於夷者也於是狄秦夏之變於夷秦人為之也又三十年而狄鄭又五十年而狄晉狄鄭猶可也狄晉甚矣

楚殺其大夫冝申

討亂不書於是鬪冝申謀弒穆王則何以書冝申之罪為欲弒商臣也冝申之罪為欲弒商臣若此而同之他亂臣之列則溢罰矣是故蔓成然事在昭十四年弒者之黨也殺之不書冝申弒者之讎也殺之書臣子可以知勸懲矣

自正月不雨至于秋七月及蘇子盟于女栗冬狄侵宋楚子蔡侯次于厥貉

外會未有言次者據襄元年晉侯衛侯次于戚之類此其言次何以楚之

欲圖伯而未集也晉雖不競君大夫數會而不序

春秋重絕晉也會于息宋陳鄭嘗從楚矣已而為

新城之盟則楚子猶未得志于宋陳鄭也於是息

會不書書及蔡次厥貉用見楚之未得志于諸侯

也

十有一年春楚子伐麋

楚初書君將也自是楚師必圍滅也而後貶人之

夏叔彭生會晉卻缺于承筐秋曹伯來朝公子遂如

宋狄侵齊冬十月甲午叔孫得臣敗狄于鹹

內大夫將言帥師其不言帥師何危之也凡君將

不言帥師重在君也言師不言君者危師之辭也

據莊八年師及齊師圍郕大夫將言帥師重在師也言將不言師

者危將之辭也

十有二年春王正月郕伯來奔有傳

此郕太子朱儒也則其曰郕伯何逆之以諸侯之

禮也春秋之法苟非諸侯雖嘗當國不成君也是

故有衛侯朔則黔牟八年不成君有鄭伯突則子

儀十四年不成君雖衛叔武列於會矣猶曰衛子


爾此郕太子也魯逆以諸侯之禮吾從而志之無

改焉何也唯其如二君也廢立之際足以亂名實則春秋不可以弗辨苟無亂於名實則春秋不辨也春秋之作別嫌明微而已有不待辨而自見春秋何治焉邲太子朱儒魯謂之邲伯晉太子州蒲晉謂之晉侯從而志之徒見其悖禮焉爾雖然凡諸侯奔則書復奔不書復者遂失國也失國恒名之據莊二十四年曹羈昭二十二年蔡侯朱二十三年莒子庚與此其不名何以爲邲伯未修春秋之辭也苟以爲邲伯朱儒則是修春秋之辭矣故凡從主人則徒修春秋之辭也

杞伯來朝二月庚子子叔姬卒有傳女未嫁不卒此何以卒許嫁而絕則喪以夫人之禮也以子叔姬見僖之喪伯姬也傳言杞桓公來朝請絕叔姬而無絕婚則是叔姬先絕復求其次杜說非

夏楚人圍巢秋滕子來朝秦伯使術來聘自韓原之戰秦恒稱人此其稱秦伯何以其能聘也

冬十有二月戊午晉人秦人戰于河曲此秦伯晉趙盾也曷爲貶稱人亟戰也本穀梁於是范山言於楚子曰晉君少不在諸侯北方可圖也而秦晉亟戰秦晉亟戰而楚君將稱君矣是故戰必言及而不言及不以秦晉主此戰也不以秦晉主此戰猶曰夫人戰焉耳略之也秦人白狄伐晉首



從之辭也晉人及姜戎敗秦師于殽敵辭也晉人秦人戰于河曲略之之辭也

季孫行父帥師城諸及鄆

十有三年春王正月夏五月壬午陳侯朔卒邾子蘧

蔭卒自正月不雨至于秋七月太室屋壞三傳同冬公如

晉衛侯會公于沓狄侵衛十有二月己丑公及晉侯

盟公還自晉鄭伯會公于棗

十有四年春王正月公至自晉邾人伐我南鄙叔彭

生帥師伐邾夏五月乙亥齊侯潘卒六月公會宋公

陳侯衛侯鄭伯許男曹伯晉趙盾癸酉同盟于新城

向也扈之盟不序諸侯此其復序何諸夏之志也

晉救江無功救鄭無功與秦亟戰而楚浸強交聘

於中國得蔡次厥貉矣而晉遂不競於是公朝晉

衛侯來會公還自晉鄭伯來會諸夏之懼甚矣汲

汲於晉而為此盟如之何勿序也以諸夏之汲汲

於晉也而徒以趙盾主是盟書曰同盟同衆辭也

自幽以來未之有也則不予晉以主是盟之辭也

秋七月有孛星入于北斗公至自會晉人納接菑于

杞弗克納

此晉趙盾以諸侯之師曷為貶稱人以晉為不競

也楚方交聘于上國得蔡次厥貉矣而晉區區納

亡公子於邾又以少陵長見辭於邾人自敗秦于

令狐盟于扈救鄭戰河曲趙盾皆不書由是訖靈
公之篇兵車之會自參以上貶人之宣十七年伐宋趙盾
為之也宣二年侵鄭

九月甲申公孫敖卒于齊有穀齊公子商人弒其君舍

未踰年之君卒不書據衛奔則但書名據鄭舍未踰年

何以得稱君梁本穀以弒罪罪商人也是故陳佗齊無

知莒展與逾年矣而不成君舍未踰年也而成君

苟弒其君世子雖成君不君之苟見弒于其臣子

雖未成君君之春秋之大義也

宋子哀來奔有傳

奔大夫恒名之此其不名何昭公之大夫也

冬單伯如齊齊人執單伯

春秋書周大夫如吾大夫然內之也伯者作天下

不知有王久矣於是魯之請昭姬晉之命隨會猶

假寵於王室而文宣之際王卿士數有事於四方

救江之役黑壤之盟王叔桓公在焉蓋汲汲於晉

葬僖公錫文公命昭含成風王季子來聘尤汲汲

於魯也而齊人執單伯以天子之使而見執於齊

商人諸侯莫為之變焉則王室益不競矣以天子

之使而見執春秋所甚懼也王叔陳生嘗相周矣

晉悼公執之則何以不書傳曰士魴如京師言王

叔之貳於戎也則是為京師執之也為京師執之

而與執單伯同罪則溢罰矣
齊人執子叔姬

十有五年春季孫行父如晉三月宋司馬華孫來盟
傳有

此華耦也則其不名何昭公之大夫也
夏曹伯來朝齊人歸公孫敖之喪六月辛丑朔日有

食之鼓用牲于社單伯至自齊傳有
吾大夫不至必見執而後至春秋書周大夫如吾

大夫然故至單伯也
晉卻缺帥師伐蔡戊申入蔡傳例說在章指

入不言伐言伐甚伐者也入未有書大夫者於是
書卻缺始自是訖春秋入稱人者邾也稱國者吳越


也邾吳越無大夫也是故自伐書陽處父入書卻
缺侵書趙穿宣元年由是凡役書大夫雖大夫自為戰

書大夫宣二年宋鄭甚者大夫與君戰亦書大夫宣十二年邾之戰成二年
鞏之戰是經之變文也

秋齊人侵我西鄙季孫行父如晉冬十有一月諸侯
盟于扈傳例說在章指

向也扈之盟趙盾為之則其不序諸侯猶曰大夫
主是盟也此晉侯宋公衛侯蔡侯陳侯鄭伯許男

曹伯也則曷為不序散辭也新城之盟不可以不
序徒以諸夏之志焉耳而晉侯不出於是楚伯成



而頃王崩葬不見於春秋諸侯無統紀甚矣故終靈公之篇凡合諸侯皆散辭傳曰無能為也

十有二月齊人來歸子叔姬

內女來歸凡三見於經此其言齊人來歸子叔姬何非其罪也叔姬配昭公生舍昭公卒舍即位商人弒之於是執叔姬

齊侯侵我西鄙遂伐曹入其郭

一役而再有事不悉書也苟悉書也則以遂言之兵事言遂必天下之大故也此其言遂何齊始敗夏盟也晉文公卒襄公能合諸侯靈雖不競而新城之盟諸夏汲汲焉固結之則猶有屬也而齊獨

為亂階執天子之使加兵於魯於是伐曹晉遂不

競而諸侯貳故悉書之也傳曰謂諸侯不能也是

故入郭皆不書據隱五年邾鄭伐宋入郭之類於齊特書之侵我皆書

人於是書齊侯異其文者異其事也

十有六年春季孫行父會齊侯于陽穀齊侯弗及盟

穀梁有傳夏五月公四不視朔穀梁有傳六月戊辰公子遂及齊侯


盟于鄆丘秋八月辛未夫人姜氏薨毀泉臺楚人秦

人巴人滅庸

此楚子也滅猶未書君將也

冬十有一月宋人弒其君杵臼有傳

弒未有稱人者其稱人何猶曰眾人殺之焉耳孔



父死於殤仇牧死於閔蕩意諸死於昭宋為有臣子矣宋非無臣子則弑其君罪不在其臣子矣是故大夫未有書官者終昭公之篇大夫特書官而意諸不言及大夫而不書官則臣子何罪意諸而言及則昭公疑於殤閔然則宋公孰弑襄夫人也賊由夫人使之若眾人然以是為君不君也是故立公子鮑而鮑免於首惡之名春秋無譏焉爾於是司城須奉昭公子以為亂而鮑殺之須母弟也殺母弟不書以是為鮑宜立者也

十有七年春晉人衛人陳人鄭人伐宋有傳此晉荀林父衛孔達陳公孫寧鄭石楚也曷為貶

稱人不予以討賊之義也宋賊無主名宜若勿討則其責諸侯以討之何子弑父凡在官者殺無赦臣弑君凡在官者殺無赦眾人弑其君亦勿罪臣子而已矣賊奈何勿討也賊可以勿討則昭公書葬矣賊可以勿討而書葬其惟魯初葬靈乎二君之禍非其國臣子為之也

夏四月癸亥葬我小君聲姜齊侯伐我西鄙六月癸未公及齊侯盟于穀諸侯會于扈有傳秋公至自穀冬公子遂如齊

十有八年春王二月丁丑公薨于臺下秦伯瑩卒夏五月戊戌齊人弑其君商人

商人之罪嘗著於春秋曷為書弒如他君久矣其為君也春秋位號從主人不以正不正未嘗有國雖鄭忽不可不謂之世子嘗有國雖商人不可不謂之君然則商人無罪歟以蔡般之見殺宜不名而名之則商人罪不容誅矣然則齊侯孰弒閻職邠歟也閻職邠歟微不稱盜而稱齊人所以罪商人也君商人人閻職邠歟其實各得其天矣

六月癸酉葬我君文公秋公子遂叔孫得臣如齊冬十月子卒有傳

惡位未定則其稱子卒何成之為在喪之君也凡君在喪恒稱子猶未葬也則稱子某莊公子般襄公子野於是

公子遂殺惡而立宣公故成之為在喪之君以弒罪罪宣公也

夫人姜氏歸于齊季孫行父如齊莒弒其君庶其弒未有書國者其稱國何猶曰國其國也而以自弒焉爾稱人罪不在臣子稱國罪不在衆人矣然則莒子孰弒太子僕也莒子生太子僕又生季佗愛季佗而黜僕而以自禍衆人何罪焉故凡稱國必易樹子殺大臣者也樹子吾貳也大臣吾股肱也親莫親於斯貴莫貴於斯賊由斯人是自賊也

陳止齋春秋後傳卷第六

後學 成德 校訂

陳止齋春秋後傳卷六

十八

通志堂

陳止齋春秋後傳卷第七

宣公

元年春王正月公即位公子遂如齊逆女三月遂以夫人婦姜至自齊有傳說在章指夏季孫行父如齊晉放其大夫胥甲父于衛公會齊侯于平州公子遂如齊六月齊人取濟西田

外取邑不書雖取諸我不書據傳襄二十六年齊取我高魚必有歸之

者也然後書是故濟西田書取謹闡書取

秋邾子來朝楚子鄭人侵陳遂侵宋

書遂伐楚言志不在蔡也書遂侵宋言志不在陳

也說在僖四年南北之勢於是始也後十五年而宋楚平

後五十年而晉趙武楚屈建同盟于宋諸夏之君
分爲晉楚之從矣南北之勢於是始故謹書之也
自是訖春秋師再有事無言遂者矣言遂者非與
國伐盟主齊侯伐衛遂伐晉事在襄二十三年則盟主伐與國也晉士鞅侵鄭遂侵衛傳曰衛叛

晉也事在定八年

晉趙盾帥師救陳

書救陳何楚由是始伯也於是楚救皆不書

據傳爲賈救鄭

鬪椒救鄭之類

宋公陳侯衛侯曹伯會晉師于棐林伐鄭

此晉趙盾以諸侯之師伐鄭則其曰宋公陳侯衛侯曹伯會伐鄭何大夫初用諸侯也靈公之世兵

車之會自參以上貶人之於是黜趙盾以其用諸

侯也春秋不以大夫用諸侯故書曰晉趙盾帥師

救陳宋公陳侯衛侯曹伯會晉師于棐林伐鄭則

不以大夫用諸侯之辭也公羊曷爲不言趙盾之辭君不會大夫之辭也

冬晉趙穿帥師侵崇晉人宋人伐鄭

二年春王二月壬子宋華元帥師及鄭公子歸生帥

師戰于大棘宋師敗績

戰未有書大夫者於是書宋華元鄭公子歸生大

夫初主戰也自此戰皆書大夫戰不書大夫者吳

也吳無大夫也

獲宋華元

說在獲晉侯

秦師伐晉夏晉人宋人衛人陳人侵

鄭

此晉趙盾用諸侯之師曷為貶稱人以晉為甚不競也楚方圖伯而晉以大夫用諸侯由是兵車之會自參以上皆貶之而自柳棼之役楚皆稱子矣

年九

秋九月乙丑晉趙盾弒其君夷臯三傳同冬十月乙亥天

王崩

三年春王正月郊牛之口傷改卜牛牛死乃不郊猶三望葬匡王楚子伐陸渾之戎

窺周室也

夏楚人侵鄭秋赤狄侵齊宋師圍曹冬十月丙戌鄭

伯蘭卒葬鄭穆公

四年春王正月公及齊侯平莒及邾莒人不肯公伐

莒取向有穀梁傳

秦伯稻卒夏六月乙酉鄭公子歸生弒其君夷傳例說在章指

首弒君者公子宋也則其蔽罪於歸生何歸生為

正卿而宋有無君之心非歸生孰禁之於歸生乎

謀先然而弗禁則賊由歸生而已矣是故歸生之

弒公子宋啓之不以罪宋而罪歸生甯喜之弒公

子鱣啓之不以罪鱣而罪甯喜董史書趙盾孔子

取焉蓋有合於春秋

赤狄侵齊秋公如齊公至自齊冬楚子伐鄭

五年春公如齊夏公至自齊秋九月齊高固來逆叔

姬有傳

公自主之也於是公如齊高固使齊侯止公請叔

姬焉則高固伉也從穀梁傳

叔孫得臣卒冬齊高固及子叔姬來

凡來譏也非歸寧之辭

楚人伐鄭

六年春晉趙盾衛孫免侵陳

趙盾之罪嘗著於春秋其再見曷為無貶自宋萬

而下無討賊者則九人而已矣

夏四月秋八月螽冬十月

七年春衛侯使孫良夫來盟夏公會齊侯伐萊秋公

至自伐萊傳例說在章指大旱冬公會晉侯宋公衛侯鄭伯曹

伯于黑壤有傳

晉靈公之會同皆不序自黑壤而下復序諸侯何

也垂隴之役初以大夫會盟自以大夫會盟而後

不序諸侯不序諸侯猶責伯者也終靈公之篇則

諸侯無貶矣以其不勝貶序之可也是故春秋自

隱而下君恒稱君貶人之故諸侯多貶辭焉自文

而下大夫恒稱大夫貶人之故大夫多貶辭焉諸

侯不勝貶則政在大夫矣大夫不勝貶則陪臣執

國命矣

八年春公至自會夏六月公子遂如齊至黃乃復有公羊傳

辛巳有事于太廟仲遂卒于垂

大夫卒恒稱名則其兼字之何自是仲氏世為卿

故譏之也本劉氏其不言公子仲遂蒙上文也大夫卒

竟內不地据定五年季孫意如卒于房竟外地据成十七年公孫嬰齊卒于貍服

壬午猶繹萬入去籥有公羊傳戊子夫人嬴氏薨晉師白狄

伐秦楚人滅舒蓼秋七月甲子日有食之既冬十月

己丑葬我小君敬嬴雨不克葬庚寅日中而克葬穀梁

有傳城平陽楚師伐陳

九年春王正月公如齊公至自齊夏仲孫蔑如京師

齊侯伐萊秋取根牟

取言公據四年伐莒取向以前皆言公取不言公非公命也自宣而下

征伐在大夫矣此年取根牟成六年取鄆襄十三年取郟皆微國也

八月滕子卒九月晉侯宋公衛侯鄭伯曹伯會于扈

晉荀林父帥師伐陳辛酉晉侯黑臀卒于扈

諸侯卒雖不出竟地之

冬十月癸酉衛侯鄭卒宋人圍滕楚子伐鄭晉卻缺

帥師救鄭

書救鄭何楚伯也元年救陳今年救鄭而辰陵之

盟序陳鄭於楚子之下遂以諸侯予楚矣

陳殺其大夫洩冶穀梁有傳

十年春公如齊公至自齊齊人歸我濟西田夏四月

丙辰日有食之己巳齊侯元卒齊崔氏出奔衛

傳例說在章指

公羊世卿非是

公如齊五月公至自齊癸巳陳夏徵舒弑其君

平國六月宋師伐滕公孫歸父如齊葬齊惠公晉人

宋人衛人曹人伐鄭秋天王使王季子來聘

自頃王而下王室無聘魯者於是再聘而王季子

實來則已尊矣

公孫歸父帥師伐邾取繹

取根牟不書師此其書歸父何伐邾猶公命也取

繹非公命也宣公而下征伐在大夫故自取繹凡

取皆不書其人

據昭元年傳季武子伐莒取鄆但書取

自伐杞凡伐皆不書

公

大水季孫行父如齊冬公孫歸父如齊齊侯使國佐

來聘饑楚子伐鄭

十有一年春王正月夏楚子陳侯鄭伯盟于辰陵

序楚子於陳侯鄭伯之上初予楚以伯也

公孫歸父會齊人伐莒秋晉侯會狄于攢函

此外會也曷為書之如吾君內之也楚方倡義於

天下而晉孜孜於羣狄至往會焉晉卑甚矣是故

楚莊王之春秋晉有諸侯之事不悉書也於宣三

年晉侯伐鄭不書五年荀林父伐陳不書

冬十月楚人殺陳夏徵舒

楚亟稱子矣自宋萬而下無討賊者雖討之不以

其罪且百年於此則楚之討夏徵舒其不曰楚子
 何春秋之法惟討賊不以內外貴賤恒稱人是故
 殺大夫恒稱國或稱人殺他國之大夫恒稱人或
 稱君據昭四年殺楚子惟討賊訖春秋稱人以是為國人殺之
 也

丁亥楚子入陳


於是楚子為陳夏氏故伐陳謂陳人無動將討於
 少西氏遂入陳殺夏徵舒則曷為不書入而后殺
據晉文先書入曹後書執曹伯予之以討賊之義也書入而后殺是以
 利陳累莊王也不以利陳累莊王則討賊一事也
 入一事也入雖若將貶人之於是稱楚子楚強甚

矣終莊王一篇雖圍滅無貶辭固進楚也亦憂楚
 也

納公孫寧儀行父于陳

凡奔非其罪納之者罪也則但書納公孫寧儀行
 父與君淫者也則其不書奔何微二子則楚師不
 出徵舒不討靈公不葬然則宜納者也則其書納
 何二子足以免於奔而已矣而納之者楚子之過
 也

十有二年春葬陳靈公楚子圍鄭夏六月乙卯晉荀
 林父帥師及楚子戰于邲晉師敗績
 大夫嘗主戰矣猶未敵君也以大夫敵君於是始



甚矣大夫強也鞏之戰不惟敵君且盟齊於師矣
秋七月冬十有二月戊寅楚子滅蕭晉人宋人衛人
曹人同盟于清丘有傳

此晉先穀宋華椒衛孔達也曷為貶稱人猶曰人
自為盟也人自為盟自鹿上以來未之有也於是
再見其再見何中國久無伯也由救鄭之後大夫
會伐自參以上皆不書至是會盟亦不書矣

宋師伐陳衛人救陳

十有三年春齊師伐莒夏楚子伐宋秋螽冬晉殺其
大夫先穀

十有四年春衛殺其大夫孔達

清丘之盟晉以衛之救陳晉討焉孔達曰苟利社
稷請以我說於是自殺衛人以說於晉而告於諸
侯稱國以殺其君意也是故苟其君意雖孔達書
殺苟非君意雖公子遂為宣公殺惠伯不書也

夏五月壬申曹伯壽卒晉侯伐鄭秋九月楚子圍宋
葬曹文公孫歸父會齊侯于穀

十有五年春公孫歸父會楚子于宋

吾大夫始特會楚也

夏五月宋人及楚人平

凡平不書必關於天下之故也而後書有與楚平
者矣於陳不書文九年於鄭不書宣十年至宋始書之宋嘗

及楚平矣信二十四年宋及楚平至莊王始書之必宋從楚必

莊王得宋天下將有南北之勢春秋特致意焉

六月癸卯晉師滅赤狄潞氏以潞子嬰兒歸

楚滅國書君將矣此其稱師何滅國之大夫猶貶

也是故荀林父滅潞氏不書隨會滅甲氏不書滅

國以其君歸皆稱爵如楚人滅弦弦子奔黃楚人

滅頓以頓子牂歸楚人滅胡以胡子豹歸第言奔

者不名之以歸者名之

秦人伐晉

此秦伯也桓公

王札子殺召伯毛伯穀梁有傳

兩下相殺雖王卿士不書據傳昭十二年劉獻公殺甘悼公十八年毛得殺毛伯過之類此

何以書斥王之辭也於是王孫蘇與召氏毛氏爭

政使王子殺召戴公及毛伯衛王孫家人也而爭

政王子一日而殺二卿則譏不但在其人也是故

終春秋纔一再書之王札子殺召伯毛伯陳侯之

弟招殺陳世子偃師皆斥君之辭也傳云王子捷

秋螽仲孫蔑會齊高固于無婁初稅畝三傳同從公羊冬蠃生

饑有傳

十有六年春王正月晉人滅赤狄甲氏及留吁

此士會也於是獻狄俘晉侯請於王王以黻冕命

士會將中軍且為太傅則何以亦書人滅終不可



以無貶也

夏成周宣榭火

有傳穀梁周災不志非是

秋邾伯姬來歸冬大有年

十有七年春王正月庚子許男錫我卒丁未蔡侯申

卒夏葬許昭公葬蔡文公六月癸卯日有食之己未

公會晉侯衛侯曹伯邾子同盟于斷道

同盟至新城而再見斷道之後不曰同盟者寡矣

秋公至自會冬十有一月壬午公弟叔肝卒

公穀左氏母弟稱弟例不取

公弟者何非見大夫也本何非大夫不卒而卒叔肝

賢之也本穀賢之所以惡宣公也凡先君之子稱公

子有謂稱弟是故宋地辰兄弟也一篇之間譏稱

宋公之弟辰無譏則從其恒稱為公子地陳公子

招一人也譏稱陳侯之弟招無譏則從其恒稱為

公子招故不弟稱弟不友稱弟不弟稱弟傳曰陳

侯之弟招殺陳世子偃師罪在招也不友稱弟傳

曰秦伯之弟鍼出奔晉罪秦伯也叔肝稱弟惡宣

公也

十有八年春晉侯衛世子臧伐齊公伐杞

自是內不言君將征伐在大夫矣

夏四月秋七月邾人戕郕子于郕甲戌楚子旅卒

有公羊傳

公孫歸父如晉冬十月壬戌公薨于路寢歸父還自

晉有傳至笙遂奔齊三傳同

陳止齋春秋後傳卷第七

後學 成德 校訂

通志堂

陳止齋春秋後傳卷第八

成公

元年春王正月公即位二月辛酉葬我君宣公無冰三月作丘甲

丘甲何丘自為甲也二十五人為兩四兩為卒卒

出長轂一乘也於甸乎取之於是有甲士魏武帝孫子甲士三人步

卒七十二人炊子守裝子之類又二十五人是一乘也丘十六井也而自為甲是丘賦

一乘也大司馬之制上地家可用三人中地二家

五人下地家二人皆勝兵也必四丘之甸也而後

備一卒出長轂一乘則是從征少而休多也作丘

甲休少而從征多矣

夏臧孫許及晉侯盟于赤棘秋王師敗績于茅戎

戰然後言敗績此不戰何以書敗績言自敗也凡

王有事譏不在諸侯出居於鄭之類諸侯有事譏不在臣子

棄其師之類則以自致之文書之雖有敵國亦自致也梁

亡齊人殲于遂王師敗績于茅戎無敵國之辭也

昔者伐鄭桓王不言敗績諱之也則曷不為定王

諱昔者討不庭則君子何忍言之於是晉人平戎

既拜成矣劉康公微戎遂伐之敗焉是故不諱書

曰敗績于茅戎而劉康公但稱師

冬十月

二年春齊侯伐我北鄙夏四月丙戌衛孫良夫帥師

及齊師戰于新築衛師敗績

衛書大夫帥師於是始大夫強也良夫世為卿至

林父出其君入于戚以叛是故雖孔達不言帥師

見文元年必若良夫而後言帥師

六月癸酉季孫行父臧孫許叔孫僑如公孫嬰齊帥

師會晉卻克衛孫良夫曹公子首及齊侯戰于鞏齊

師敗績秋七月齊侯使國佐如師已酉及國佐盟于

表婁

凡帥非卿不書據傳文三年晉救江書陽處父不書先僕襄十七年衛伐曹書石買不書孫蒯之類雖卿也

非元帥亦不書據傳襄元年圍宋彭城書晉欒黶不書荀偃宣二年戰大棘書宋華元不書樂呂之類書四

卿是各自帥也會伐不言帥師此其言帥師何四

卿並出各自為帥也自文之季年而無使介至是
 而無將佐魯三家之勢成矣於是衛未有大夫將
 書孫良夫曹無大夫書公子首而賞鞏之功晉於
 是有六卿征伐在大夫不獨魯也以四國之臣戰
 齊君甚矣鞏戰之忿也齊桓合九國之師以臨楚
 屈完來盟於師桓不欲以臨楚盟屈完也退而盟
 召陵齊侯使國佐如師進師于表婁而後盟國佐
 且夫屈完不言使而國佐言使屈完不言使而退
 盟之於召陵以禮於楚子國佐言使而進盟之於
 表婁以偏齊君桓公之所不敢而四國之臣敢為
 之甚矣鞏戰之忿也

八月壬午宋公鮑卒庚寅衛侯速卒取汶陽田冬楚
 師鄭師侵衛十有一月公會楚公子嬰齊于蜀

凡吾君會諸侯則有大夫得稱其大夫僖二十五年莒慶
二十六年衛甯速

苟無諸侯則不以大夫敵吾君是故莒無大夫

則曰莒人浮齊有大夫則曰齊大夫既及高後盟

及晉處父盟始以大夫敵吾君矣皆不言公以是

為齊晉之譏則諱公焉耳此其曰公會楚公子嬰

齊是公自與嬰齊夷也於楚之會孟公後諸侯至

於楚之會宋公亦後諸侯至魯猶重從楚也公與

嬰齊夷楚何譏焉不足為公諱焉爾是故自屈完

以來楚大夫皆無氏族也而書公子自嬰齊始

丙申公及楚人秦人宋人陳人衛人鄭人齊人曹人邾人薛人鄆人盟于蜀

此楚公子嬰齊蔡侯許男宋華元陳公孫寧衛孫良夫鄭公子去疾也曷為貶稱人楚大夫初會盟也是故諸侯之大夫復不序晉大夫初會盟則不言公楚大夫初會盟則其言公何公固與嬰齊夷矣無足諱焉爾

三年春王正月公會晉侯宋公衛侯曹伯伐鄭辛亥葬衛穆公二月公至自伐鄭甲子新宮災三日哭乙亥葬宋文公夏公如晉鄭公子去疾帥師伐許鄭初書大夫將也

公至自晉秋叔孫僑如帥師圍棘公羊有傳

不言叛內言圍皆叛也

大雩晉卻克衛孫良夫伐虜咎如有傳冬十有一月晉侯

使荀庚來聘衛侯使孫良夫來聘丙午及荀庚盟

聘而遂盟之於是始

丁未及孫良夫盟鄭伐許

狄鄭也其狄之何楚之伯鄭人為之也由齊桓以來爭鄭於楚桓公卒鄭始朝楚諸夏之變於夷鄭為亂階也至辰陵鄭帥諸夏而事楚矣敗晉于邲盟十四國之君大夫於蜀皆鄭為之是故狄秦而後狄鄭微秦鄭中國無左袵矣

四年春宋公使華元來聘三月壬申鄭伯堅卒杞伯來朝夏四月甲寅臧孫許卒公如晉葬鄭襄公秋公至自晉冬城鄆鄭伯伐許

稱鄭伯說見桓十三年

五年春王正月杞叔姬來歸仲孫蔑如宋夏叔孫僑如會晉荀首于穀梁山崩秋大水冬十有一月己酉天王崩十有二月己丑公會晉侯齊侯宋公衛侯鄭伯曹伯邾子杞伯同盟于蟲年

六年春王正月公至自會二月辛巳立武宮公羊有傳取鄆衛孫良夫帥師侵宋夏六月邾子來朝公孫嬰齊如晉壬申鄭伯費卒秋仲孫蔑叔孫僑如帥師侵宋楚公子嬰齊帥師伐鄭

楚初書大夫將也自是必圍滅也而後貶人之

冬季孫行父如晉晉欒書帥師救鄭

晉嘗救鄭矣不書宣十年士會救鄭於是書救何鄭不服也

鄭自辰陵無役不從楚敗晉于邲盟諸侯之大夫于蜀再伐許春秋於是狄鄭蟲牢之盟鄭始服而楚人爭鄭未已也今年救鄭明年合九國之眾以復救鄭而鄭伯會楚公子成於鄧於是執鄭伯殺行人伯蠲而鄭不急君晉於是歸鄭伯使鍾儀合晉楚之成矣

七年春王正月麋鼠食郊牛角改卜牛麋鼠又食其角乃免牛吳伐郟有傳



吳初入伐中國也

夏五月曹伯來朝不郊猶三望秋楚公子嬰齊帥師伐鄭公會晉侯齊侯宋公衛侯曹伯莒子邾子杞伯救鄭八月戊辰同盟于馬陵公至自會吳入州來

吳楚之交兵不書

據傳伐楚伐巢伐徐子重七奔命

至是始書之傳曰是

以始大通吳於上國晉人為之也盟於蒲景公將始會吳吳不至於鍾離而後至盟於雞澤悼公又逆吳子吳不至於戚而後至吳之為壘久矣其不敢自列於諸夏而晉求之急將以罷楚也楚罷晉亦不復伯矣入州來不可以不錄其始也

冬大雩衛孫林父出奔晉

八年春晉侯使韓穿來言汶陽之田歸之於齊晉欒書帥師侵蔡公孫嬰齊如莒宋公使華元來聘夏宋公使公孫壽來納幣晉殺其大夫趙同趙括秋七月天王使召伯來賜公命冬十月癸卯杞叔姬卒內女為夫人恒書卒其不言卒者出也杞叔姬嘗出矣則曷為書卒以杞伯之來逆喪則不可以不卒也

晉侯使士燮來聘叔孫僑如會晉士燮齊人邾人伐邾衛人來媵

媵何以書公親與為禮也媵細故也人微者也以微者行細故而公親受之則不可不書也是故苟

不親雖改葬惠公隱弗臨不書苟親之雖衛人晉人齊人來媵書然則媵者無譏與媵必以同姓齊人悖矣

九年春王正月杞伯來迎叔姬之喪以歸公會晉侯齊侯宋公衛侯鄭伯曹伯莒子杞伯同盟于蒲公至自會二月伯姬歸于宋夏季孫行父如宋致女晉人來媵秋七月丙子齊侯無野卒晉人執鄭伯晉欒書帥師伐鄭冬十有一月葬齊頃公楚公子嬰齊帥師伐莒庚申莒潰楚人入鄆

此嬰齊也向也於會蜀稱嬰齊於盟稱人今也於伐莒稱嬰齊於入鄆稱人一人之身俄而進退焉

春秋之於楚無所不盡其辭也莊王之篇圍滅無貶辭莊王卒春秋志楚強而已矣是故於柏舉戰稱人奔稱囊瓦

秦人白狄伐晉鄭人圍許城中城

十年春衛侯之弟黑背帥師侵鄭夏四月五卜郊不從乃不郊五月公會晉侯齊侯宋公衛侯曹伯伐鄭齊人來媵丙午晉侯孺卒秋七月公如晉說在文二年冬十月

十有一年春王三月公至自晉晉侯使卻孺來聘己丑及卻孺盟夏季孫行父如晉秋叔孫僑如如齊冬十月

十有二年春周公出奔晉有傳

周公楚也王卿士雖奔不名必王子也而後名王子奔必嘗與廢立者也王人奔不言出言出必嘗去位者也非王人也則不在其國而後不言出據公孫敖公孫歸父晉先蔑

夏公會晉侯衛侯于瑣澤秋晉人敗狄于交剛

中國敗夷狄皆不書唯晉特書之特書晉者病晉也楚方聘魯平宋合諸侯之大夫于蜀討陳夏徵舒觀兵于雒矣而晉區區爭地於羣狄是故宣成之春秋晉有事於秦楚或略不書而甚詳於滅狄以是為晉衰也晉之衰諸夏之憂也

冬十月

十有三年春晉侯使卻錡來乞師

外乞師不書必盟主也而後書乞卑詞也見晉之無以令與國也

三月公如京師公羊有傳注非是夏五月公自京師遂會晉侯

齊侯宋公衛侯鄭伯曹伯邾人滕人伐秦

於是戰于麻隧秦師敗績則其但書伐何畧之也自狄秦以來秦晉之相加兵皆略之是故戰于麻隧秦師敗績但書伐晉以為不足詳焉爾

曹伯盧卒于師秋七月公至自伐秦冬葬曹宣公

十有四年春王正月莒子朱卒夏衛孫林父自晉歸

于衛秋叔孫僑如如齊逆女鄭公子喜帥師伐許九月僑如以夫人婦姜氏至自齊

夫人婦姜氏有姑之恒稱也若妾姑也則不書氏是故有成風則出姜不氏有敬嬴則穆姜不氏所以別嫡姑也

冬十月庚寅衛侯臧卒秦伯卒

十有五年春王二月葬衛定公三月乙巳仲嬰齊卒

公羊有傳

癸丑公會晉侯衛侯鄭伯曹伯宋世子成齊國佐

邾人同盟于戚晉侯執曹伯歸于京師

凡例非是說在章指

執未有稱爵者此其稱晉侯何討有罪也曹伯之罪不著于春秋曷為以討辭書之曹伯殺太子而

自立者也然則負芻之罪曷不著於春秋曹伯盧卒未有即位者公子與太子爭立猶兩下相殺而已矣書殺太子是有二尊也猶兩下相殺而已矣則其討之何不討之則嫡庶之亂將接迹于天下矣是故特書晉侯

公至自會夏六月宋公固卒楚子伐鄭秋八月庚辰葬宋共公宋華元出奔晉宋華元自晉歸于宋

宋華元

宋殺其大夫山

有傳

於是華元使華喜公孫師帥國人攻蕩氏殺子山則何以稱國稱國殺無罪之辭也蕩澤弱公室則曷為例之以無罪不氏所以別其非無罪也不氏

所以別其非無罪也則稱國有司法守之辭也
宋魚石出奔楚

於是魚石向為人鱗朱向帶魚府出奔楚則其但
書魚石何凡奔必有罪也眾不可以勝罪則罪此
甚焉魚石以楚師伐宗國入彭城為宋患之日久
是以甚魚石也

冬十有一月叔孫僑如會晉士燮齊高無咎宋華元
衛孫林父鄭公子鮑邾人會吳于鍾離

晉初以諸侯之大夫會吳也傳曰始通吳也於是
大夫自為會矣殊會齊桓公所以尊王世子也齊
桓公以殊會會王世子厲公以殊會會吳吳之為
蠻久矣而與王世子同文甚矣厲公之為中國患
也

許遷于葉

於是楚公子申遷許于葉則其曰許遷于葉何以
其從夷狄雖遷之猶自遷也是故遷于夷以公子
棄疾遷于白羽以王子勝皆以自遷之文書之

十有六年春王正月雨木冰穀梁有傳夏四月辛未滕子卒鄭

公子喜帥師侵宋六月丙寅朔日有食之晉侯使欒

黶來乞師甲午晦晉侯及楚子鄭伯戰于鄢陵楚子

鄭師敗績二傳同楚不言師從公穀楚殺其大夫公子側秋公會晉侯

齊侯衛侯宋華元邾人于沙隨不見公穀梁有傳公至自會

公會尹子晉侯齊國佐邾人伐鄭

會伐未有書王人者此其書尹子何初以王卿士與伐也春秋不以諸侯用王師雖齊桓不得與單伯序也陽處父之救江也王叔桓公不書雖前年伐秦之役劉子成子猶不書也於是厲公恣矣初以尹子與齊國佐邾人序甚矣厲公之無道也

曹伯歸自京師

執君不名歸然後名之此其不名何以京師釋之也負芻有罪矣而京師釋之則異於他歸者矣不名之可也

九月晉人執季孫行父舍之于茗丘冬十月乙亥叔

孫僑如出奔齊十有二月乙丑季孫行父及晉郤驪

盟于扈公至自會乙酉刺公子偃

刺公子偃殺有罪之辭也從啖氏公子買戍衛不卒

戍刺之殺無罪之辭也春秋序事而不言故言故皆譏也

十有七年春衛北宮括帥師侵鄭夏公會尹子單子晉侯齊侯宋公衛侯曹伯邾人伐鄭

王人未有書二卿者書二卿皆與伐也

六月乙酉同盟于柯陵

其不指言諸侯何二子與盟也言諸侯則疑於葵丘狄泉之盟諱王子虎於是不諱曷為不諱會伐

未有書王入者唯晉厲公特書之會盟不足諱焉爾是故書同盟其尹子之盟與抑厲公之盟與莫適為主之辭也

秋公至自會齊高無咎出奔莒九月辛丑用郊晉侯使荀瑩來乞師冬公會單子晉侯宋公衛侯曹伯齊人邾人伐鄭十有一月公至自伐鄭壬申公孫嬰齊卒于狸脰十有二月丁巳朔日有食之邾子矍且卒晉殺其大夫卻錡卻欒卻至楚人滅舒庸

此公子橐師也

十有八年春王正月晉殺其大夫胥童庚申晉弑其君州蒲

晉侯孰弑藥書中行偃也晉侯一日而尸三卿又執書偃將殺之而以自禍是故稱國楚商臣殺鬬勃而後弑君晉藥書中行偃殺胥童而後弑君春秋不列於孔父以是為不能與其君存亡者也然則書晉殺胥童不書楚殺鬬勃何也書殺胥童以累州蒲也不書殺鬬勃不以累頹也州蒲稱國以弑而弑頹斥商臣二君之所以異也是故弑不言故弑而言故有自來者矣晉殺其大夫卻錡卻欒卻至晉殺其大夫胥童晉弑其君州蒲蔡殺其大夫公子駟蔡放其大夫公孫獵盜殺蔡侯申春秋書弑未有詳於此者也

齊殺其大夫國佐公如晉夏楚子鄭伯伐宋宋魚石復入于彭城

奔大夫復不書

據文十一年宋蕩意諸昭五年秦后子之類

莊閔而上有書歸

若入者矣則皆不書奔者也

鄭突曹赤齊小白蔡季許叔魯季子之類

奔而言

歸自衛元咺始元咺訟其君者也雖然歸猶言自也若宋魚石晉欒盈是賊而已矣是故魚石不言

自楚欒盈不言自齊

公至自晉晉侯使士匄來聘秋杞伯來朝八月邾子來朝築鹿囿己丑公薨于路寢冬楚人鄭人侵宋

嬰齊也

晉侯使士魴來乞師十有二月仲孫蔑會晉侯宋

公衛侯邾子齊崔杼同盟于虛打

崔杼嘗奔衛不言歸其再見何齊納以為大夫也向也曰崔氏今日崔杼則已為大夫也齊之禍靈公為之也前年逐高無咎今年殺國佐而杼當國已而殺高厚齊無世臣矣於是伐莒伐魯皆杼帥師焉而后弒齊之禍靈公為之也


丁未葬我君成公

陳止齋春秋後傳卷第八

後學

成德

校訂



此下...
 本...
 山...
 全...
 此...
 整...

